

經略復國要編

經畧復國要編卷之六

與叅軍鄭同知趙知縣書

二月初一日

承手教臨江水解兵馬難渡忽爾水退蹈淺過之又獲奇功此天助李將軍也况玄蘇鎮信宗逸已斬止有行長一人譬之漏網之魚其膽已喪諒不足畏而李將軍又預施埋伏更以勁兵追擊真稱上策天心人事兩濟其美王京之倭殲之定在刻下矣但慮貴萬全事當慎重我之火器固利而彼之鳥銃亦足相當如初角之時當先施我火器佯欲進兵實且未進誘其放盡鳥銃然後一鼓下之無難也又倭勢甚衆

李將軍提兵深入不俟自當先時調遣何待諱諱但虜正充斥不俟目
所親覩徒費口賴撫按決不肯從故仰城公屢復之
實不得已也不然寧有已事不急而急他人事者斷
不若是左矣恐仰城公猶望此兵或致悞事幸門下
以鄙意復之但日催劉綎從陸路陳璘兵從水路速
來以備夾擊耳惟籌畫機宜激勵將士乘破竹之勢
以一當百功收全勝固不在兵之衆寡間也如勢未
可乘暫與相守亦可外鄙見一二開列於後祈二公
與仰城酌行之

一兵家用間當在敵處兩難之際今倭奴欲守王京則懼我兵火擊欲歸日本又畏關白族誅正進退維谷時也乘此機會陳以利害誘以封爵贈以厚賚無不樂從者王洙張大善固為可使若便捷小心如本部指揮黃應揚亦可備一臂之用即今已在軍前如欲用之一聽仰城公驅使也

一朝鮮居民在王京者四萬餘暫從倭衆其為主真心破家積憤思一得當以報者四萬人固一心也且平壤已捷其望我師如望雲霓四萬人亦一心也當此人心思變之時密令敢死人潛入城中

給免死帖期以大兵一至城下即據北山為內應
彼此夾攻即百萬兵馬可盡滅之但人屬異國心
難逆料亦當預防聞攻平壤時朝鮮婦女上城助
擊我師此又出恒情外者倘王京居民亦然洩漏
此機以計就計未必無也故不信之則坐失機遘
信之恐有他變又在門下與大將軍熟計之慎防
之耳

一關自見在對馬島駐札聞彼兵被創必益兵救援
不可不慮如偵有間道挑選精銳將兵一二枝
多帶火器直至渡頭如船泊彼岸者用計燒之船

來救援者俟其近岸火器齊發內可截其歸路外
可却其援兵魚在釜中奚能全活是一策也亦當
熟計行之不佞處火器甚多俱陸續盡發軍前備
用

一遼兵既不可借劉綽陳璘兵又難卒至彼衆我
寡大將軍憂之誠是鄙意謂朝鮮士卒雖柔脆難
用而鼓舞有方調度得法即弱可使強寡可使衆
前隊冲鋒火砲為先然亦必挑撥精銳以為選鋒
朝鮮疲卒止用搖旗呐喊庶敢死者破敵怯弱者
助威既可保全朝鮮兵卒不必他有調遣此兩利

之道也亦可行否又聞朝鮮兵士善射者亦多用
以當鋒必能取勝此又不可與疲卒槩用于後也
一王京居民與倭雜處彼此難辨况破城之日事
在倉卒恐致混殺設若有之既失天朝往援之意
又孤屬國望救之心亦非大將軍與本部體上天
好生之德聞軍中法令嚴肅本部固不必過慮但
事關生命陰功係之仰城公富貴已極正宜修積
則今日當重者端在此也其拒敵者固難輕宥其
勢屈而降者望加意辯別公與本部預發免死帖
數千給之意亦為此再望於匆忙之際更加嚴禁

不許混傷則不惟功高亦且德盛不惟勇震亦且仁全惟門下留意焉

一賞不避讐罰不避貴斯能服衆李寧愛將欲斬以殉退縮一兵手刃不惜軍令可知矣若下城之日妄戮之禁不加嚴切不惟有傷陰德亦且忌功者易生萋菲尤望仰城公嚴加禁約有犯必誅庶三軍知畏不致混傷我公後昆亦必大有興者故不憚諱諱或足備軍中一籌第途懸百里事屬一家少有所得不敢默默惟門下不我見罪斟酌善用之或亦有裨一二云

與艾主政書

初一日

芻糧事重勞遠涉鄙心殊為不安近日平壤開城雖已盡復第倭奴併集王京不下二十餘萬其勢甚盛李提督率兵將近王京已在大江東岸兵之需糧馬之需草萬分緊切門下目覩其急自是留心何煩過慮第事屬同舟日夜懸念誠恐路隔千里多有江河阻絕若不預備橋梁舟楫豈能飛渡耽延時日嗷嗷待餉所關非小訪得遼陽都司張三畏頗有幹才特令往見門下及朝鮮國王商議先以平壤所儲穀草火速發解仍令三畏預往前途凡遇渡口或設橋梁

或備船隻糧草一至如履坦途庶師必宿飽後縱可
期門下功為第一矣設將官中有便捷者隨公再命
數人協贊三畏更妙諸惟督促至禱至禱

檄王郎中并遼東道

初一日

一為倭情事據經理糧餉艾主事呈稱江邊等處備
辦糧草陸續搬運義州責令朝鮮人畜向前轉運當
大兵見今攻取王京應用糧草但時日長久將不能
繼若再發銀召買恐山東一帶地曠人希民稱苦累
收買為難及案查先准本部王郎中手本內開遼東
道屬定遠左等各衛并鳳凰湯站江沿等堡應徵二

十年分屯糧甚多催完亦可接濟昨本職親厯各堡
該倉官吏皆云並無赴堡上納除移文遼陽道并王
郎中催督外惟恐遲延未便合無呈乞本部牌行該
道及王郎中將二十年屯糧并二十一年鹽糧作速
上緊催完陸續接濟軍餉不致匱乏等因到部看得
大兵深入攻取王京遲速難以逆料芻糧必須預備
庶克有濟先據該司道呈報定遼等各衛鳳凰城等
各堡俱有應徵屯糧鹽糧堪充軍餉且省糴貲今照
艾主事復行呈詳前因相應亟為催督上納牌仰該
司道官吏即便會同遼陽道王郎中將定遼等衛鳳

鳳等堡應徵二十年分屯糧二十一年分鹽糧差委
的當官員分投催督上納收貯各城堡堆積一面將
陸續上納過各糧數目徑即移文艾主事知會以便
發車轉運接濟大兵可無匱乏之慮毋得遲悞

咨遼東撫院

初一日

一為遵

旨專責部臣等事准

欽差巡撫遼東都御史趙 咨為緊急倭情事內稱近
聞大兵過江已克平壤則王京指日亦可復朝鮮疆
土既恢似芻糧易辦且本鎮先備米豆草束尚可足

二三月之用前項臨德山東所儲應否仍行轉運合
咨貴院煩請台裁希由咨示以便預處施行准此看
得遼鎮芻糧雖足二三月之用止可供給官軍經過
行糧若令盡數往彼搬運十日之勞不足一日之用
即今大兵深入王京朝鮮各道軍民向被倭賊焚掠
已空軍中糧草常苦不足縱目下克復王京所運糧
餉不但可供征倭官軍即有多餘亦可濟禦虜軍士
所據前項米豆應該搬運合咨貴院煩請查照施行

報遼東李撫院書

初二日

承念鄙人冰雪遠行深感深感昨據李提督塘報開

城倭奴又斬百餘其在八道者盡奔王京似已落膽
其勢甚合聞其數不下二十餘萬我兵僅三萬餘雖
仗台慈威福或可徼功而孤軍深入衆寡迥殊未知
後事何如耳軍中機宜尤望指授為禱又承念及糧
餉面催各官真仁人之心目下將兵去王京僅百餘
里去愛州則千餘里矣解運一或耽延所關非細故
不佞分道督促猶恐怠緩晝夜提心幸我門下復為
留意夫憲臺一言官役拱聽三軍可以宿飽藉甚何

如

與中軍都督楊元書

初二日

門下與戚將軍等冒險先登功居第一覩來札極知
血戰苦辛即古名將何加焉不俟題叙必當首錄其
餘次第務秉公心不徇私請惟為我一慰將士慎勿
紛紛爭論內失朝廷體統外生屬國笑端所係非
小也再祈門下與各將領愈奮雄威一收完績即百
世銘之豈止目前之紀哉旦夕竚俟捷音不盡

檄都司張三畏

初二日

一為大兵乘勝進取王京諸路事照得大兵深入開
城地方進取王京在即但糧料轉輸不迭亟應議處
除中國糧料見今陸續運發外而平壤之東尚有各

地方倭奴未曾侵陷及焚掠未盡者不論官民之家必有積粟相應查出借貸以供軍食俟平倭畢日我地搬運餘剩者照數補給轉移之間庶為便益且春氣融和江凍已解搬運不無阻滯亦應亟為修搭橋樑拘集船隻以便利涉牌仰本官即便前詣平壤以及大兵屯劄沿途隔絕江河處所應修搭橋樑者即便轉咨國王差遣陪臣協同修搭應用船隻者即查彼國船隻拘停在岸聽候載渡搬運糧料仍於平壤一帶地方有積粟之家不論官民勸其借貸登記在官俟事畢補還仍咨國王獎賞其積粟不多不肯借

貸者亦不必苦強務使糧餉充足大兵不致匱乏方
克有濟其本官原管義州鎮日運糧草并陸續車到
應給腳價等項本部已另文行文主事令其委官前
來代管毋得違悞

移本部咨

初二日

一為緊急倭情事節該本部咨催調劉綽等軍兵赴
遼策應去後近准朝鮮國王咨為進兵示威以紓賊
患事議政府狀啓節該天兵已到開城西路一帶
閫備俱為空虛如益水東海鷺山嶺等處雖令本國
官兵分路把截而兵力單弱防守不固加以近日春